

**PEMBERITAHUAN PERTANYAAN BUKAN LISAN DEWAN RAKYAT
MESYUARAT PERTAMA, PENGGAL KEDUA
PARLIMEN KEEMPAT BELAS**

PERTANYAAN : BUKAN LISAN
**DARIPADA : TUAN LUKANISMAN BIN AWANG
SAUNI [SIBUTI]**

SOALAN NO. 247

Tuan Lukanisman bin Awang Sauni [Sibuti] minta **MENTERI PENDIDIKAN** menyatakan berapakah jumlah statistik pelajar yang tidak menamatkan persekolahan sekolah rendah sejak 2016 hingga 2018 dan jumlah statistik pelajar yang tidak mendaftar ke sesi persekolahan tingkatan 1 pada 2019.

JAWAPAN

Untuk makluman Ahli Yang Berhormat,

Kementerian Pendidikan Malaysia (KPM) sangat komited meningkatkan akses pendidikan dan melaksanakan program atau intervensi bagi menangani isu keciciran murid. Berdasarkan statistik, jumlah murid yang tidak menamatkan persekolahan peringkat sekolah rendah adalah sebanyak 1.63 peratus pada tahun 2016. Manakala, bagi tahun 2018 adalah sebanyak 2.33 peratus.

Pelbagai usaha yang telah dilaksanakan oleh KPM bagi membendung isu keciciran murid serta memastikan kanak-kanak kekal bersekolah sehingga tamat tingkatan 5. Inisiatif Peningkatan Akses daripada Peringkat Prasekolah hingga Menengah Atas dilaksanakan dengan tujuan meningkatkan enrolmen semua peringkat persekolahan dan menangani masalah keciciran di sekolah. Inisiatif ini terdapat dalam Pelan Pembangunan Pendidikan Malaysia 2013-2025.

Terkini, KPM juga telah menyediakan satu garis panduan bagi membantu murid-murid yang berisiko cicir agar mereka kekal bersekolah sehingga tamat tingkatan 5 iaitu Garis Panduan Mengurus Murid Berisiko Cicir di Sekolah (GPMBC). GPMBC ini telah dikuatkuasakan pada 1 Jun 2018 ke semua sekolah kerajaan dan bantuan kerajaan. Pemantauan oleh pihak sekolah kepada murid berisiko cicir dapat dijalankan dan intervensi yang sesuai dapat diberikan kepada murid berisiko cicir. GPMBC ini juga mempunyai objektif bagi memastikan pemantauan murid khususnya murid berisiko cicir dapat dibuat oleh pihak Jabatan Pendidikan Negeri (JPN), Pejabat Pendidikan Daerah (PPD) dan sekolah secara berterusan.

Selain itu, KPM turut melaksanakan program rintis yang dikenali sebagai Program Sifar Murid Cicir (PSMC). Sebanyak satu JPN dan lima PPD telah dipilih. Program ini merupakan intervensi berfokus bagi membantu murid cicir untuk kembali bersekolah. Dapatan rintis tahun 2018 telah menunjukkan bahawa PSMC telah berjaya mengembalikan 25.7 peratus murid peringkat sekolah rendah untuk kembali meneruskan persekolahan mereka. PSMC ini akan diperluaskan ke semua PPD pada tahun 2019 ini.

RT33/245